

東
華
續
錄

東華續錄

咸豐五十八

臣王先謙敬編

臣陶澐宣恭校

三月戊午朔諭軍機大臣等和春福濟奏鳳潁各屬徧地匪蹤未便飭令官兵赴豫一摺昨因英桂奏稱捻匪大股回竄皖境永城解圍諭令徐宿兩軍毋庸赴豫皖境捻匪責成鄭魁士等剿除原以軍情變幻靡常全在隨地隨時相機剿辦此時歸德情形已援而張落刑尙在雉河潁州鳳陽所屬均被賊擾無賴之徒煽惑幾至十數萬之多鄭魁士等兵勇伊興額等馬隊自應畱皖剿辦惟該匪飄忽靡定如鄭魁士等剿辦得手餘匪復竄豫境或擾徐州卽當迅速追擊與英桂所派之兵並傳振邦等會同夾攻何處緊急卽在何處堵剿斷不可稍存畛域之見致誤大局見在匪勢蔓

延皖境粵匪既未肅清捻匪又復肆擾設或互相勾結爲患曷可
勝言鄭魁士追剿懷遠匪徒既獲大勝著卽飭令迅將該匪次第
掃除先清皖境毋許延誤將此由五百里諭令知之○已未諭軍
機大臣等托明阿等奏憑陳嚴截賊援緊攻瓜州情形一摺瓜州
逆賊自我軍築圍進逼以後旣已野無可掠惟金陵南岸及下蜀
街高資並六合儀徵等處時有出竄急應水陸並截一面擣破巢
穴爲聚殲之計乃月來攻剿不過小有斬獲而瓜州賊匪竄出與
金陵賊黨相連已於江中洲地徧布營壘逆賊方張殊堪憤懣昨
已諭令托明阿等乘該逆竄出攻取瓜州並與向榮吉爾杭阿等
掃除江洲賊壘絕其南北相連著卽設法辦理毋得以該逆困守
不出爲詞觀望遷延自干重咎再據翁同書條陳軍務請扼要津
聯陸路斷岸奸議火攻增小紮等五條籌畫頗合機宜著托明阿

等卽將該員所陳體察情形採擇辦理翁同書原片著鈔給閱看
將此由六百里諭令知之○諭前據葉名琛奏續雇紅單船二十
七隻於十二月初二日啟程茲據托明阿等奏稱疊次催提杳無
信息等語見在瓜州一帶堵剿喫緊此項船隻由粵赴洋將及三
月如已駛至浙江甯波一帶卽著何桂清嚴飭管帶船隻之護參
將李新明等趕緊駛赴江南聽候調遣毋任沿途逗畱致誤事機
將此由五百里諭令知之○庚申諭軍機大臣等前據滿慶奏廓
番有求和之意諭令赫特賀等速籌妥辦茲據該大臣奏稱噶布
倫等查明該夷實係畏罪乞和其中並無虛僞先行繕給檄諭等
語廓爾喀與唐古忒等尋釁滋事已逾一載輒敢占踞地方肆意
要求經該大臣派兵前往堵剿宗喀等處屢次獲勝該夷震懾兵
威特差番目乞和將所控多收稅課般傷人命各款遵照斷牌辦

理以完前案此次所稟既係實心乞和即可乘其悔悟之機妥爲籌辦以示羈縻至廓爾喀短收稅課阿乃銀錢一萬元唐古忒按年補繳一節據噶布倫查明此項銀兩爲該夷應收之數每年願由商上交給承領此項銀兩雖出自商上不至有傷國體所慮該夷因此一事以後更肆要求著赫特賀等諭知該夷告以此事不敢陳奏如爾國實心恭順將所占地土退還清楚本大臣自必詳加覈算諭令唐古忒遵依俾爾國得有裨益如此辦法將來該夷不敢再生枝節方爲妥善赫特賀此次檄諭於繳銀一節並不提及頗爲得體可俟噶布倫等稟覆情形再行酌辦務在因勢利導以期日久相安川省毗連藏地屢次諭令樂斌等籌辦見在該夷既悔罪乞和計日當可蒞事前調土兵自可暫緩派往矣將此由五百里各諭令知之○王戊諭內閣駱秉章奏收復永明江華兩

城追賊疊勝南路肅清一招湖南永明江華兩縣爲廣東廣西匪徒竄踞經駱秉章密飭選用道王鑫由郴州分軍援剿署江藍廳同知顏培南等兵勇在永明之午田橋等處擊賊獲勝王鑫旋督大隊馳往合剿賊匪聞風潛遁旋即收復縣城王鑫等即移軍馳剿江華之江東埠毛坪等處擊賊連勝疊破城東賊營進逼縣城賊乘夜遁逃我軍追殺無算收復江華縣城王鑫復率勇跟追沿途殺賊千餘此時湖南南境業已肅清其零星竄匿餘匪均被各屬紳團擒解正法所辦尙屬妥協選用道王鑫督勇剿賊厥功最著著以道員歸部卽選署江華縣知縣任立誠把總李貴芳雖隨同收復縣城究屬疏防於前均著革職以示薄懲○駱秉章奏江西西路臨江瑞州袁州三府所屬均已淪陷吉安府城亦正被圍劉長佑所部兵勇二千名仍嫌單薄已抽調南北兩路各勇先赴

醴陵瀏陽邊界俟劉長佑進剿分隸數營合成四五千之數以厚其勢嗣接探報從九品毛英勃援剿萍鄉行至蘆溪遇賊眾數千突至毛英勃率其弟毛英俊督勇力戰殺賊數十嗣因路徑生疏眾寡不敵被賊四面圍裹毛英勃毛英俊同時力竭捐軀並陣亡勇丁二十六名幸前調之都司田興恕等到界結營楚東橋賊始卻退卽選道劉長佑於正月十七日抵省臣面與商酌楚軍越境須由瀏陽醴陵攻克萍鄉萬載兩縣始可規復袁州蓋以江西西路諸郡縣均淪於賊湖北之匪又隨時添入若止從一路進兵賊必悉力抗拒攻克爲難臣當札飭瀏陽醴陵兩縣官軍歸劉長佑統領合之劉長佑舊部楚勇及增募之勇數近五千令其馳赴醴陵相機進剿並札飭卽選同知直隸州知州蕭啟江等均聽劉長佑調遣以一事權劉長佑進取萍鄉於二月初四日由黃花渡進

兵初六日行至青山鋪疊次誘賊出巢分路轟擊十一十二兩日連獲大勝賊匪被剿窮蹙悉由袁州大路竄去遂復萍鄉縣城統計般斃賊匪千餘名生擒長髮賊目四十二名奪獲軍械旗幟不計其數其駐瀏陽之蕭啟江等軍於初九日進駐萬載縣境珠樹潭十一日袁州府城之賊糾黨數千潛來撲營疊經蕭啟江等前後追擊賊匪紛紛敗潰官軍乘勢掩殺追至河岸賊匪沿河潰逃撲水死者甚多共計斃賊千名生擒五十二名奪獲藤牌槍矛多件其由江西義甯州及瑞州各屬窺伺瀏陽東界之賊又經團練黎端甫等先後堵擊殲斃甚多此次逆蹤由義甯而擾西路首逆石達開先陷瑞州次陷臨江袁州探聞吉安亦於正月二十五日被賊攻陷數郡千里之間無一官一兵相爲援應楚師出境非克復萍鄉萬載將附近各賊殲除則不能進剿袁州克復袁州後非

又將附近各屬賊匪殲除則不能進剿各郡未復之處既須客兵助剿已復之處又須客兵代防楚師五千名雖皆百戰之餘然越境以後兵分力單顧後瞻前動多牽掣深恐師行濡滯有誤事機首逆石達開悍而多詐江西風氣積柔兵勇見賊卽靡僅恃曾國藩水陸兩軍爲之搢搆而曾國藩陸勇不滿七千戰守俱形單薄以江西見在局勢而論鄂城速下則羅澤南一軍可以倍道馳援固爲上著儻堅城難以遽破而江西盼救甚殷似非閩浙廣三省各簡銳師由該省東路南路速進不可江西地居腹中爲東南四達之區於目前剿賊局勢關繫非淺臣既有所見不敢不畢獻其愚忱此次打仗出力員弁兵勇可否由臣覈明勞績彙案保獎出自天恩其追賊陣亡之藍翎從九品毛英勃請照縣丞例議卹六品軍功毛英俊請照把總例議卹上諭此次湖南官軍應援

江西兩路疊獲勝仗克復萍鄉縣城實能不分畛域勦辦尙屬得手著駱秉章迅飭帶兵員弁將萬載一路股匪次第殲除進剿袁州以圖克復所有出力員弁兵勇著准其彙案酌保追賊陣亡之藍翎從九品毛英勃著照縣丞例議卹六品軍功毛英俊著照把總例議卹○翁同書奏上年托明阿等建築土圍臣與德興阿因南北地勢不同苦口力阻始終不從本年二月二十七日金陵鎮江悍賊萬餘合股渡江次日約同瓜州之賊直撲土圍由土橋一帶越圍縱火兵丁紛紛潰走德興阿帶隊往援托明阿親督接應力戰竟日傷亡甚多賊眾分路鈔襲處處火起各營盡燬托明阿退守三汊河二十九日賊由樸樹灣過河德興阿帶隊迎勦托明阿亦由三汊河回顧後路秦家橋一帶又有大股賊匪過河圍攻參將毛三元營盤而東岸各營亦已爲賊所毀此時揚州大震全

局已壞不敢不據實直陳伏乞嚴飭招集潰兵暫顧目前並飭下河臣嚴防北竄以維大局文煜奏瓜州賊匪於二月二十八日突出數千名竄至土橋並將土橋烏塔溝各營盤衝踞二十九日探得托明阿西岸營盤均被焚毀德興阿所帶馬隊尙在接仗托明阿等均退守三汊河陳金綬雷以誠毛三元各營亦被衝塌焚燒托明阿見在秦家橋揚城無兵恐難保守糧臺駐邵伯係屬鄉鎮見在賊蹤已由陸路東竄患在肘腋臣相度機宜前路一經逼近必應設法那移惟有激勵團練安撫居民於沙頭加意防堵上諭軍機大臣等托明阿等圍攻瓜州師久無功軍心懈弛所築長圍本不足恃致令賊匪合股渡江將土橋烏塔溝各營衝踞托明阿等西岸營盤均被焚毀該大臣退守三汊河而毛三元營盤被賊焚燒陳金綬雷以誠兩營亦被衝踞揚州軍營大局已壞該大

臣等貽誤之罪殊堪痛恨見在賊勢鴟張亟宜嚴防北竄本日已諭令吉爾杭阿派撥兵勇由下游渡江迎頭截剿並調水師於江面扼截續來之匪並諭邵燦嚴防清江一帶伊興阿德昌所帶馬隊官兵已諭英桂飭赴清江並諭崇恩撥兵前來均歸邵燦調遣托明阿等著卽收集潰兵扼要堵剿杜賊北竄之路邵伯鎮糧臺距賊甚近自應設法那移著傳論文煜相度情形妥爲安設此時江北事機萬分喫緊該大臣等儻不知奮勉力圖遏截賊鋒國法具在斷難倖邀寬宥見在如何籌辦情形著隨時馳奏並知照邵燦吉爾杭阿相機截擊毋得再事遷延將此由六百里加緊諭知托明阿陳金綬雷以誠並傳論文煜知之○諭瓜鎮兩處逆賊偷越出竄縱火焚燒托明阿等營盤兵勇多有傷亡托明阿一退再退竟由三岔河暫駐秦家橋陳金綬雷以誠毛三元各營盡被衝

塌焚燒此時大局已壞不但揚州震動卽清江一帶兵力過單北
竄可虞托明阿等軍心敗散卽使收拾潰卒亦難維持全局著吉
爾杭阿飛速挑撥精兵壯勇派令得力大員統帶由東路過江繞
出賊前遏其北竄其沿江水師各礮船亦恐托明阿等調度不及
著吉爾杭阿嚴督水營將弁在瓜州江面力圖扼截毋令該逆接
踵而至其鎮江攻剿事宜仍著布置周密勿稍疏虞將此由六百
里加緊諭令知之○諭見在托明阿全營兵丁大半潰散卽使收
集散亡亦難復振設淮安清江一帶稍有疏虞大局何堪設想邵
燦兵練爲數無多難資堵遏豫東兩省毗連江境亟應分兵應援
所有伊興額等馬隊千名本日已有旨飭令回至蒙亳此時淮揚
情形緊急著英桂卽飭伊興額德昌帶兵卽日飛馳由徐州一路
前赴淮揚崇恩出省防剿所調各路官兵諒已到齊著卽酌撥勁

旅迅速馳赴清江淮安一帶力扼賊衝均歸邵燦調遣並確探賊情隨時馳奏將此由六百里加緊各諭令知之○諭瓜州逆匪被圍日久突致衝出大肆鴟張托明阿等各營既毀我軍失勢此時賊勢蔓延既向運河兩岸則高郵邵伯一帶接連淮安清江勢尤可虞邵燦見權河督駐守清江亟應力籌堵禦之策徐州捻匪未滅傅振邦等防剿近日情形未識如何尤須豫防逆匪乘勢勾連本日已諭吉爾杭阿派兵由江東繞出賊前力遏北竄又令崇恩派兵前赴淮徐一帶協同攔剿其伊興額等所帶馬隊一千名亦令英桂飭調前赴淮徐交邵燦調遣清江防守兵單邵燦卽速將伊興額等馬隊迎提並催提山東派撥兵勇相機調度力保淮徐卽以扼賊北竄之路將此由六百里加緊諭令知之○諭文俊奏吉安失陷撫建贛南危急情形一摺吉安被圍日久雖在事文武

竭力堅守卒以外援不至賊勢狃狃以致孤城淪陷覽奏實深憤恨撫建二府密邇寇氛情形倍爲喫重該逆又復分黨廣聚秦和南窺贛境且由永豐竄徧樂安此時周鳳山堅扼樟鎮彭玉麟堵禦上游劉于濤駐紮市汊皆不過以防爲剿周汝筠之勇旣因潰敗回贛遮克敦布一軍亦僅能扼守崇樂要隘若不嚴飭該遊擊等節節進剿則我退而賊進其勢必更蔓延著曾國藩文俊仍令周汝筠遮克敦布各勇探賊所向迅速迎擊庶可轉敗爲勝本日已另諭葉名琛等揀調精兵五六千名派委得力大員統帶前赴江西應援應由何處進兵著文俊等催提前進至臬司周玉衡理問周恩慶遇害情形著曾國藩文俊確查具奏再降諭旨其圍城文武如何下落一併查奏周玉衡之子周炎所募贛勇二千本爲救援吉安見因賊踞泰和未能衝過亦著曾國藩等飭令隨剿隨

進以期稍遏賊氛將此由六百里加緊諭令知之○諭本日文俊奏賊匪攻陷吉安見在分踞泰和撫建贛南均被震動並稱據胡林翼咨武漢外援賊匪被剿下竄有五六千人由大冶興國竄入江西等語楚北賊黨既分股回擾江境北界義甯一帶則武昌漢陽逆匪無多正當乘機進取以擣其虛官文統師進逼漢陽已逾數月大小數十戰均有斬擒前奏水陸攻剿情形籌畫似有把握胡林翼亦屢獲勝仗著該大臣等激勵將士迅克兩城肅清江漢爲協剿江西之計若楚賊已經分出而武漢收復尙稽時日則我師處處受其牽制兵疲餉絀腹地蔓延該大臣等豈能辭咎羅澤南一軍最爲驍勇善戰前此楚疆危急經曾國藩派往應援見在江省如此喫重該大臣等惟有迅圖克復武漢則羅澤南一軍即可回援江西再原任巡撫江忠源前奏軍務八條除撤提鎮一條

可無庸議外其餘各條著該大臣等體察近日時勢採擇辦理原摺鈔給閱看將此由六百里諭令知之○諭江西賊勢蔓延情形萬分喫緊必應厚集兵力以資進剿此時廣東省勦辦餘匪漸次肅清著葉名琛等卽行挑選精兵五六十名配齊軍裝器械派委得力將弁迅速管帶啟程前赴江西聽候文俊調遣並著將該官兵啟行日期先行具奏毋稍遲誤將此由六百里加緊諭令知之○御史侯雲登奏上年秋間蒙亳捻匪讎起捻首張落刑勾結蘇添幅翼得王貫三侯寶爲等五股合爲一股荼毒生靈所過之區悉成焦土蒙亳迤北歸德迤東良民遠避夥匪肆行數百里以內幾無人煙其始誤於張維翰之疊失事機其繼誤於武隆額之節節退守幸賴 聖明洞鑒知武隆額不克勝任撤歸葉桂調遣英桂平日辦事每多寬縱卽如張維翰之貽誤並不撤回武隆額之

退避並不查參豫省爲畿輔屏蔽歸德爲河南門戶況歸德一帶
近接河干決河未堵防備綦難儼捻匪踰河而北勾結東省災民
患將有不堪問者我皇上宵旰憂勤拯民水火調兵選將早在
宸算之中及早圖之尙易爲力聞此股捻匪搶掠貨財堆積如山
不願棄巢遠去儼稍延時日則裹脅愈多聲勢愈大將來糜餉勞
師爲患更鉅臣籍隸歸德確知捻匪情形與居民被害之慘不敢
不據實直陳又奏捻匪擾及四省調兵需時莫若以勇濟兵其數
易集請於安徽河南江蘇山東接壤之區擇要設立勇營特派熟
悉情形素繫人望之員就近督辦一切應行事宜卽由督辦之員
奏明辦理已革左副都御史袁甲三籍隸河南見在隨同英桂剿
辦捻匪儼蒙皇上破格錄用假以事權必能布置裕如不負委
任上諭前有旨令已革左副都御史袁甲三隨同英桂剿辦河

南擒匪見在該匪雖竄回皖境究未大受懲創自應厚集兵勇痛加剿洗惟招募壯勇勸約鄉團必須經理得人認真督辦方不至有名無實袁甲三籍隸河南諒已抵英桂軍營與該撫籌商一切事宜於堵剿擒匪能否得力著英桂察看具奏直隸山陝官兵業經啟程赴豫見在歸德並無匪蹤卽當酌量派撥馳往皖境會剿不得株守一隅徒糜軍餉伊興額所帶馬隊千名據和春等奏已令馳援歸德此時擒匪回竄自應速飭回至蒙亳一帶與鄭魁士等合力剿捕至道員張維翰帶兵失機並釋放張落刑之姪以致該匪藐視官軍大肆猖獗著該撫查明該員貽誤情形據實參奏有人奏請設立勇營並陳辦法四條著鈔給英桂閱看將此由五百里諭令知之○以鄧仁堃爲江西按察使

由督鹽道遷

○予江西陣

亡鹽大使沈鵬清等祭釋世職○癸亥祀

先農親耕藉田○甲

子諭內閣托明阿奏瓜州逆匪撲出自請治罪一摺並另股逆匪竄入揚城等語托明阿等督師江北一載有餘瓜州叢爾鎮城不能力圖攻克已屬大負委任乃此次逆匪突圍出撲由土橋一帶分股亂竄二月二十九三月初一兩日遂致徐家集新集子薛家樓等地方均有逆賊上竄各路兵勇紛紛潰敗揚州府城復被闌入托明阿先事既不能嚴防迨逆匪撲出復不能力爲扼截雖經副都統德興阿督帶馬隊連日截殺斃賊數千而營盤連失府城復陷托明阿調度無方實堪痛恨陳金綬雷以誠以幫辦大員駐兵東岸迨逆匪直撲三汊河營盤並不派兵接應見在退至何處亦未與托明阿會合均屬恒怯無能厥咎甚重托明阿雷以誠均著先行革職陳金綬業經革職所有三品頂帶並著先行革去聽候查辦正白旗漢軍副都統德興阿著賞加都統銜投爲欽差大

臣並著詹事府少詹事翁同書幫辦軍務先就見存兵勇擇要嚴扼毋令該逆擾及清淮一帶其由揚州旁竄之路亦卽分投堵剿毋稍疏忽至失守營盤之總兵松齡參將毛三元遊擊滿祿協領奇成額均著卽行革職仍畱德興阿軍營戴罪自效儻再不知奮勉卽行嚴參治罪○諭軍機大臣等托明阿奏逆匪分股竄撲揚州復陷各等語此時清淮下游極關緊要該大臣等亟宜扼要駐紮嚴防北竄我兵自潰散後馬步兵勇數已無多著德興阿等先就見有兵勇與江浦等處調來兵勇設法堵剿務將該逆北犯之路設法扼住方可徐圖攻城之策切不可專顧攻城爲賊牽制致令高寶一路稍有疏虞本日已諭令吉爾杭阿派兵由揚州東路繞越北渡鈔出賊前並調山東直隸陝西等處官兵赴清江交邵燦調遣該大臣卽與吉爾杭阿邵燦會商何處扼要卽由何處扼

截總期妥爲布置以固北路藩籬陳金綬雷以誠見在何處何以東西兩岸聲息絕不相通著卽查明據實具奏綠營潰兵亟應趕緊招集見在陳金綬革職何人可勝幫辦之任著德興阿於帶兵大員中酌保一員候旨簡派見在革職留營之參將毛三元聞其尙得兵心著該大臣責令隨同所保之員收集潰兵加意管帶將此由六百里加緊諭令知之○諭前因文煜等奏報瓜州賊匪越圍竄擾運河兩岸當經諭令吉爾杭阿派撥兵勇渡江由東路繞出賊前截擊見在揚州失守賊眾均由鎮江等處糾合而來志在北竄清江見無重兵駐守情形萬分喫重著怡良吉爾杭阿遵照前旨於鎮江軍營挑選精壯兵勇派委得力大員統帶由通泰繞出賊前嚴扼清淮一帶以杜北竄毋許稍涉遲緩並著將派定統兵之員速行具奏至金陵鎮江沿江賊壘仍著向榮吉爾杭阿督

飭兵勇實力攻剿使該逆有所牽制不至悉數北渡其浦口等處並著向榮等飭令統帶師船各員嚴密防範是爲至要再曾望顏奏請雇火輪船以清江面一摺據稱火輪船船身高大最爲利用若雇募四隻入江必可將江內賊船悉行掃蕩赴粵雇募以江南士商報效爲詞等語此項火輪船是否可期得力著向榮怡良吉爾杭阿妥速籌商具奏原摺著鈔給閱看將此由六百里加緊各諭令知之○諭瓜州逆賊糾合南岸匪黨分股北竄闖入揚州府城徐淮情形最爲喫重已派員撥兵在清江一帶防堵復恐該逆由天長滁州等處直竄臨淮與徐宿捻匪互相勾結爲害更鉅著和春福濟迅派得力大員酌帶兵勇扼守臨淮關杜其北犯之路將此由六百里加緊諭令知之○諭見在揚城失守雖據托明阿咨調兵勇一面攻剿一面飭文煜督帶練勇在邵伯一帶扼要堵

截兵勇單薄恐難得力清江爲南北往來水陸要衝實爲北地門戶邵燦所轄河漕弁兵除分撥徐州勦辦捻匪外爲數無多難資堵截當此北路空虛事宜先其所急著桂良卽將前派赴河南酌畱在長垣防堵之官兵一千八百名仍令羅玉斌管帶星速馳赴清江並著英桂將陝西前調赴豫省之駐防官兵一千名俟迎提到防後一併飭令前赴清江其伊興額等所帶馬隊一千名著英桂仍遵前旨飛催前進勿任逗畱各該省所調官兵到後俱著暫歸邵燦調遣並著桂良英桂一面檄調各兵一面飛咨邵燦俾得隨時相機調度勿稍遲延將此由六百里加緊各諭令知之○予廣西陣亡訓導胡慶麟等祭葬世職○乙丑諭內閣會國藩奏軍營保舉人員請准給封典等語會國藩軍營節次保舉各員選補尙無實缺自應先被光榮著援照羅澤南李續賓給予封典前旨

准其擇保尤爲出力者數員按照原保官階咨部給予封典毋許
冒濫其有告假回籍者槩不准給以示區別而勵戎行○諭軍機
大臣等翁同書奏收集潰兵嚴杜北竄並派兵由揚州北路進剿
一摺邵伯爲清淮門戶見經翁同書與文煜紮營六牘口自可嚴
扼北路要衝惟所集潰兵僅止千餘深恐難資堵剿陳金綬雷以
誠見已革職其所帶兵勇是否全在沙頭地方卽著德興阿翁同
書札調布置一面力扼上游一面相機進剿其秦家橋蔣王廟兩
營及沙頭六牘兩處見存兵勇併計共有若干該大臣等於收集
齊全後卽行分撥防剿以期振作所請添兵赴邵伯之處前已有
旨令吉爾杭阿飛速挑撥精壯兵勇派令得力大員統帶由東路
過江繞出賊前迎頭截擊昨復降旨令怡良吉爾杭阿選派大員
管帶兵勇由東路通泰等處繞出揚州之前計該督等接奉前旨

當已趕緊籌派仍著怡良等迅速催趨前進並將派兵若干何員
統帶先行馳奏將此由六百里各諭令知之○曾國藩文俊奏臣
等遵查江西地勢以樟樹鎮爲最要見有周鳳山彭玉麟周壽彝
等水陸各軍駐紮用全力扼守樟鎮以保東岸而衛省垣又查各
路賊情金陵逆匪由湖北入江境者以偽易王石達開爲首偽檢
點賴積新陷瑞州偽豫王胡以洗等陷袁州偽春官丞相張遂謀
等攻臨江吉安粵東另股土匪由湖南茶陵等處入江境者以周
培春人數爲最多又有賊目葛耀明關志江等於瑞州臨江投入
石逆大股之中賊目王義潮劉夢熊分屯吉安泰和亦已與石逆
合併爲一石逆見回臨江分遣賊黨攻圍贛州又有鄂省新到之
賊及興國土匪於二月初八日攻撲武甯縣該逆久踞臨江兇悍
之賊必萃於此南則窺伺贛州南安以通兩粵之餘匪北則踞守

武甯新昌以通九江之歸路全勢注於江西意圖盡披枝葉困我
省會兇謀詭計實可痛恨查劉長佑一軍見因道途梗塞尙無入
江確信臣等擬令該員先攻袁州俟克復後卽由分宜新喻直下
與周鳳山一軍會合以攻臨江不必先往吉安恐孤軍深入腹背
受敵再查德安縣城被賊竄踞上年臘月有瑞昌及興國州土匪
竄入該縣賊目係武甯之葉至華興國之劉棕魁等約二千人該
縣與瑞昌毗連賊蹤去來無常春初僅贖數百人正月全數竄出
嘯聚於武甯瑞昌之間二月竄入武甯縣境被該縣兵勇剿散初
八日有湖北新到賊股合之興瑞土匪攻撲縣城至周汝筠一軍
設法疏通一節查屢次搜獲僞文據稱粵東賊目王義潮統賊萬
餘阻禦泰和使用周汝筠之師不得進援吉安臣文俊前因其救援
不力曾另調遊擊遮克敦布統率兵勇由樂安永豐一帶取道援

古詎遮克敦布起程數日卽得吉安失陷之信臣等卽令遮克敦布扼隄樂安屏蔽撫建並令周汝筠退回贛州防守惟賊眾兵單不得不急求外援相應請旨飭下兩廣總督廣東巡撫速派兵勇三四千人直赴贛州會同戰守再臣曾國藩接據探報賊蹤已近撫州上游十分緊急卽於二月十八日由南康起程赴省二十日途中接彭玉麟飛稟周鳳山連日血戰十八日與賊接仗全軍失挫若該逆直犯省城深爲可虞臣曾國藩一面單舟進省會商守城事宜一面飛調湖口青山水陸各軍同回省垣以固根本又奏臣等前請調羅澤南帶兵來江助剿先後接奉諭旨令俟武漢克復酌量催調惟見在賊氛日熾江境軍情萬分喫緊而湖北武漢之賊又堅守不出我軍日與相持城池勢難遽下與其頓兵堅城攻克無期不如移師腹地速救江西應請旨飭下湖北撫臣速令

羅澤南兼程來江援勦實有裨於大局胡林翼奏

臣

接據曾國藩

函稱吉安府城失陷江西軍情日緊速調羅澤南李續賓提師回

援

臣

思首逆石達開擾害江西粵東流匪合併更益以本境土匪

連陷江西州縣則南贛撫建固屬可危浙閩湖南尤深遠慮東南

大局所關

臣

何敢以鄂中一省之事而忽然不顧羅澤南之議則

曰武漢爲南北樞紐視他省關繫獨大上綰荆襄下控吳皖未可

棄而不顧

臣

再四思維南岸各軍力攻八十餘日戰士良苦遽行

撤調未免功墮垂成且羅澤南之軍虧欠正二兩月餉項江西庫

帑亦竭卽令剋日速援而欠餉行糧必應速爲籌措

臣

之水師火

具已齊湖南大礮亦到默計旬日之內春汛初起漢陽南岸背之

沙渚可期漲溢則賊舟難於閉藏水賊或可燒而走也

臣

定計力

圖克復如旬日無成則鄂省戰守惟

臣

無可諉責自當權其緩急

籌措餉項先以數千人赴援 上諭寄諭湖廣總督官文等胡林翼如能旬日之間克復武漢則羅澤南一軍即可回援江西儘克復尚須時日先行派兵分援亦須仍由羅澤南等統帶前往方能得力該督等務當權其緩急不可稍存畛域之見致誤事機將此由六百里諭令知之○諭前因文俊奏報吉安失守當經諭令葉名琛等撥兵五六千名前赴江西聽候調遣本日據曾國藩文俊奏會籌各路堵剿情形請飭廣東迅撥重兵防守贛州一摺逆賊石達開胡以洗等糾合各路匪徒萃於江西連陷瑞臨袁吉四郡自攻陷吉安後復分遣賊眾攻圍贛州該郡爲江右雄鎮稍有疏虞後患不可勝言惟該省賊眾兵單實屬不敷剿辦自應亟爲籌撥著葉名琛柏貴遵照前旨速行挑選精兵五六千名派委得力將弁統帶剋日馳赴贛州相機堵剿該郡待援急迫葉名琛等務

須不分畛域迅速派撥毋稍遲延該官兵等啟程日期並著先行馳奏將此由六百里諭令知之○江甯布政使文煜奏潰勇句應賊匪揚城失陷得旨潰勇句結以致揚城失守竇堪痛恨若輩本不足恃何雷以誠任用無疑益思琦善之先見爲不謬也○胡林翼奏二月初三日賊以數百人掘隄使我兵不能及城知縣劉騰鴻督率鄉勇於隄上迎擊賊匪敗退我兵分路追殺鈔至長虹橋賊伏突起劉騰鴻誓以死戰用礮轟之適臣中路東路兵勇俱以大隊接應殺賊無算該逆大敗入城連日堅閉不出初九日督臣官文約期大舉臣與羅澤南督飭各營豫備攻城器具分路進攻乘夜集於城下先砍其濠邊木柵二重繼以土囊稻草填其城濠兵勇用梯登城城賊拋擲火毬亂石繼以槍礮我勇受傷者多毫無退志相持一時之久終莫能登臣以礮傷士卒太多遂令暫退

忽見城上之礮自裂傷賊甚多據逃出之賊供稱是日城上之賊
爲我軍礮斃者以四五百計又因礮裂而自斃者有辜姓頭目一
名我軍受傷及陣亡者亦已六百名初十至十五等日賊匪時以
數百人出城搗戰疊被我軍鈔擊下游青山窯灣一帶爲陸路接
應賊糧之道臣擬分兵扼守羅澤南等前往審視營基見賊之大
隊盡由武勝門出不下三四萬人排列六七里之遙其前隊八九
千人更番出戰羅澤南等設伏要擊都司何紹彩亦率勇來援追
殺六七里斃賊四百餘人同知蔣益澧等駐紮小龜山賊不能踰
乃由紫荊山橫出與大東門之賊會合又爲湘勇所敗二十三日
賊在小龜山延燒民房大東門之賊亦來接應羅澤南等分軍擊
剿賊眾大敗殲斃六七百人餘賊踰溝而逃署提臣楊載福於二
月初五日率水師十營自沌口至鸚鵡洲分隊循東西兩岸而下

距賊船約四五里該逆乘風上駛我軍以火攻之賊船悉燬其南

岸舊及東岸鮑魚套之賊船亦先後被我軍焚燒臣等水陸各軍

自冬至春幾於無日不戰見在李續賓等移紮下游窯灣羅澤南

仍駐洪山臣當中路長虹橋一面至水路之賊見匿於武漢兩城

之下外以沙洲爲護內與陸賊相依計惟有多用火具乘風延燒

趁勢追剿或可得手目下春水方生旬日之內必可剋期大舉聚

而殲旃所有陣亡之千總彭本餘等應請旨飭部分別從優議卹

其餘在事出力文武員弁及陣亡受傷勇目容臣查明彙請獎卹

上從之○以何倭爲江蘇布政使由江淮鹽運使遷○撥淮海關銀二

十萬兩備江南餉需○丙寅諭內閣英桂奏請動用部發寶鈔一

摺著照所請准其於部頒用印寶鈔內就近撥用三十萬串以應

軍需並著戶部照數補造頒發俟鈐用藩司印信後仍由該省同

前發餘贖寶鈔十萬串一併解部以行定款○諭軍機大臣等惠親王奏籌備倉儲一摺見在軍務未竣南漕缺額近畿糧價昂貴自應設法籌備以實倉儲盛京地方連年豐稔上年僧格林沁曾經派員前往勸捐除提用外尚有贏餘著承志等先將見存捐款就近購買穀石雜糧並遴委廉幹人員勸導本地紳民無論銀錢穀米均可一律報捐所有收買及捐輸各項糧石著陸續由海運津起剝解交京倉存積該署將軍等務須悉力體察妥爲辦理毋誤儲峙將此諭令知之○諭熱河一帶地方連年豐稔糧價平減著柏凌體察情形實力勸諭紳民捐買糧米所收糧石著陸續運解京倉毋誤儲峙將此諭令知之○諭近畿糧騰貴南漕缺額軍儲所繫綦重亟應設法籌備直隸各屬固有偏災其完善之區連年尙屬豐稔著桂良督同所屬體察情形除黃水浸灌及曾經被

援地方毋庸勸辦外餘著實力勸導紳民捐輸米穀所收糧石著於河間府一帶地方量擇嚴密處所妥爲囤積以備應用將此諭令知之○諭惠親王奏黃河險要請飭派大員勘查等語見在瑞麟慶祺於簡調新任後均應來京陛見即可取道沿河履勘著瑞麟於黃河南岸慶祺由黃河北岸分路繞行均自潼關起至黃河決口止親歷河干詳細察看形勢將兩岸扼險對渡以及附近鎮市集場逐一繪繕明晰圖說於到京之日呈覽將此各諭令知之○諭翁同書奏駐兵邵伯嚴扼北路文煜奏督飭練勇扼堵沙頭各摺片此時揚州西北一路據托明阿奏報潰兵歸隊已及過半浦口等處暫調之兵亦已趕到西北一帶兵力稍集著德興阿卽督飭帶兵各員實力截剿務將該逆悉數擊回勿使分竄之賊再過大營以北然後力圖攻克揚城方有把握至東北一帶兵勇過

單六插畱兵僅止七百餘名沙頭練勇又止四百餘名雖經翁同書文煜多方激勵誠恐難期得力昨經疊降諭旨令怡良吉爾杭阿派兵由通泰一路開道赴援此項官兵由東岸繞赴北面時著德興阿翁同書相機分撥應剿應堵妥爲布置至翁同書所稱量力防堵不敢遽行分兵所見甚是但究係文員恐未能帶隊接仗著德興阿酌派得力將領一二員前赴六插交翁同書調遣至此次逆匪越牆竄出究係何人營盤先失土橋一帶各營是否陳金綬雷以誠駐兵之地西岸官兵接仗何以東岸並無一兵接應雷以誠既退沙頭又赴艇船並將所撤之勇撥赴仙女鎮陳金綬甚至查無確耗其退避情狀實堪痛恨著德興阿翁同書確切查明據實參奏本日又據英桂奏伊興額德昌所帶馬隊仍請畱江北糧臺支應等語此項馬隊昨已諭令由宿州馳回清江交邵燦調

是所需餉銀自應仍歸文煜糧臺接濟其豫省欠解銀六萬五千兩並著文煜行催該省趕緊籌解毋致延誤將此由六百里諭德興阿翁同書並傳諭文煜知之○諭邵燦奏揚營兵潰請飭山東撥兵助剿一摺前因瓜州逆匪越圍撲擾運河兩岸諭令崇恩酌撥勁旅馳赴清淮一帶候調茲據邵燦奏稱清淮防禦極爲喫緊見在兵勇無多不敷堵剿著崇恩仍遵前旨於該省前調各路官兵內迅速挑選精壯兵丁一千名派委得力將弁統帶剋日馳赴清江聽候邵燦調遣毋許遲延貽誤並將該官兵啟程日期卽行馳奏將此由六百里諭令知之○予江西被戕縣丞趙泳等祭葬世職○丁卯諭軍機大臣等昨因惠親王奏黃河險要請派大員勘查諭令瑞麟慶祺分路自潼關起至黃河決口止親歷查勘復思見在情形蘭陽決口以下最爲緊要著瑞麟慶祺改由蘭陽漫

流所至山東境內分路繞行詳細履勘凡由江南山路湖路至山東必經之所何處扼險以及附近鎮市場集逐一繪繕明晰圖說於到京之日呈覽所有前諭由潼關查至黃河決口之處著毋庸議將此由五百里各諭令知之○釋遣戍軍臺已革總督訥爾經額罪交直隸總督桂良差遣委用○戊辰向榮奏逆匪竄擾炭渚橋頭一帶臣令總兵張國樑等添兵助剿該逆撲犯下蜀街營盤張國樑帶勇馳援立將賊匪擊退余萬清等由高資往攻炭渚又將賊踞村落焚毀該逆復糾眾至下蜀街對山一帶築壘並分股直撲我營鄧紹良惟以兵單賊眾爲言毫無布置臣因與署將軍福興等籌商張國樑勇敢有爲素爲各營兵勇悅服昨經派往助剿若就近接統諸軍較能得力二月二十日檄令張國樑總統各軍飭鄧紹良抽帶楚兵凱勇撤回龍潭更換副將秦如虎帶領廣

西兵勇及四川台勇一千三百人馳往下蜀街並歸張國樑調遣復經吉爾杭阿派令虎嵩林帶兵一千六百餘名由高資前來會剿該逆大股竄屯橋頭築壘甚多張國樑審度地勢情形將各兵勇分別移營賊見我軍逼近連日出黨來撲均經官兵擊退適吉爾杭阿於二十四日由鎮營馳抵高資親至東西堰履勘形勢復令秦如虎等屯兵兩峽橫山之上聯絡聲勢並分紮山下防賊內竄之路二十六日張國樑密派兵勇夜襲顧家壩賊壘將溝外椿籤焚毀一空該逆復分股下竄張國樑自領各軍進攻下蜀街對山各壘二十七日出隊連破賊壘三座共殺賊一千五六百名其東西堰等處亦經秦如虎等分督進攻直抵橋頭焚破賊壘二座殺賊數百名並馳回下蜀街沿江追剿將洲上賊卡十餘處悉行焚毀二十九日又將下蜀街新築賊壘二處乘勝燬毀其另股賊

匪欲來應援復經兵勇截回乘勝連破太平橋大小二壘賊屍偏地餘匪奔向三思莊賊巢秦如虎督同李鴻勳等兵勇追殺張國樑復調集大隊乘勢攻撲該逆伏匿壘牆施放槍礮我軍仍前進逼適撫臣吉爾杭阿由東西堰馳至督軍會勦合力奮攻該逆越濠奔竄兵勇追勦十餘里斃賊無算統計連日破賊七壘焚斬溺斃之賊四千有餘生擒二百餘人見在下蜀街橋頭炭渚一帶一律肅清惟黃泥洲有賊壘三座逼近高資若將該處賊壘埽除即可斷其沿江竄路總兵吳全美江長貴合圍蕪湖賊壘連日均有斬獲其副將李德麟所領各船上勦大通之賊與吳全美派來之船會合攻擊燔沈賊船二十餘隻奪獲九隻生擒賊匪十五人擊斃淹溺無算上游漸次肅清足扼賊匪下竄惟有催令江長貴等迅圖埽蕩蕪湖賊壘力殄餘氛其打仗陣亡之把總虎振岡守備

徐鎮海六品軍功徐汝璜仰懇

天恩俯准交部從優議卹

上

諭內閣金陵逆匪大股外竄蔓延炭渚橋頭一帶張國樑總統各軍連破賊壘斃賊四千餘名見在下蜀街一帶肅清總兵吳全美等合攻蕪湖賊壘連日均有新獲副將李德麟上勦大通之賊焚毀賊船數十隻斃賊無算見已駛回蕪湖扼勦仍著向榮督飭張國樑等乘勝速將黃泥洲賊巢埽蕩會勦高資一帶務須扼斷該逆內竄各路並飭總兵吳全美等迅將蕪湖賊股殄除毋再遲延虎振岡等均交部從優議卹○諭向榮等奏請將提督各員分別議處革職等語前因金陵賊匪外竄經向榮派令陝西提督鄧紹良總統諸軍會同余萬清通籌勦辦該提督偏執已見調度乖方復不能力圖截擊以致賊蹤上下合併迨該逆爭壘撲營輒以兵單爲詞毫無布置鄧紹良著拔去花翎並交部議處湖南守備劉

加祥於鄧紹良調回龍潭時任聽兵勇貪夜撤退營盤被賊竄踞
雖經張國樑虎嵩林營兵卽時奪回而該守備不遵調度罪有應
得劉加祥著先行革職責令戴罪剿賊如再不知奮勉卽著嚴參
治罪○己巳 皇后祀 先蠶○向榮奏瓜州營盤失利托明阿
退軍秦家橋揚州危急江北情形萬分喫緊大局所關非得威名
素著之提鎮大員不足以振兵氣查鄧紹良前在廣西湖南力保
危城上年援剿徽州克復蕪湖尤爲賊所深憚昨由六里店撤回
龍潭止因意見之誤見已愧奮出力其所帶湖南兵勇能戰能守
若令統領往援足可制賊當卽函商吉爾杭阿並屬由鎮營揀派
得力勁兵會同往援據稱已派廣東兵八百名虎勇三百名先往
揚州調鄧紹良渡江統領並令知府溫紹原隨同剿辦臣已飛檄
鄧紹良抽帶湖南兵七百五十名凱勇五百名由龍潭拔隊取道

高資渡江會合溫紹原之勇由儀徵一帶進剿仍隨同托明阿等保固揚州以扼北路門戶見在張國樑已帶兵回抵龍潭所有東陽排頭庵各軍併歸調遣飭卽乘勝剿辦務期迅就掃除再將我兵移紮石埠橋逼近觀音門沿江聯絡舟師以通北岸聲勢上諭軍機大臣等本日據文煜奏揚城逆匪竄撲萬福橋西岸窺伺裏下河督勇堵截獲勝又據托明阿奏剿敗西北兩路分竄賊匪並中途接仗獲勝各一摺逆匪竄踞揚城由便益門外紮陣東渡在萬福橋西岸焚掠雖經練勇擊退而揚城迤東之霍家橋嚴家橋新馬頭等處在在堪虞存勇止四百名沙頭萬福橋兩營勢極危險薛家樓司徒廟七里甸等處又爲西北要道並有逆賊數萬豫備北竄打通儀徵六合之說托明阿等雖獲有勝仗而逆勢猖獗西北兩路及東路一帶均應嚴密設防杜其紛竄托明阿請調

廬州舒城官兵二千赴揚協剿見在皖省剿匪正在喫緊恐難分
撥已諭令和春等飭催伊興額德昌迅帶馬隊千名馳回清江其
直隸官兵一千八百名陝西調赴豫省之駐防官兵一千名山東
官兵一千名均赴清江著德興阿等選派統兵得力大員駐紮清
江會同邵燦以爲揚州後路聲援如揚城一帶情形緊要必需馬
隊方能得力即可飛咨邵燦就近將伊興額德昌等所帶之兵調
撥見據向榮奏江北情形喫緊派鄧紹良抽帶湖北乾鎮河兵七
百五十名凱勇五百名由龍潭取道高資渡江會合溫紹原之勇
由儀徵一帶進剿並據吉爾杭阿奏調派廣東官兵八百名虎勇
三百名由焦山渡江疾趨揚州又據翁同書奏防堵邵伯之兵僅
有七百餘名揚營潰兵僅截回四百餘名不敷分布近復盤獲奸
細至邵伯探路有欲攻陷高郵之說西路大軍阻於西南東路兵

勇數千及鎮江援師除撥勇數百駐紮灣頭外餘皆以防裏下河
爲名距通北大路甚遠並片奏請簡重臣會剿或命邵燦帶兵扼
守等語已詳細批示萬福橋爲糧臺重地邵伯爲北路要衝設有
疏虞關係非細德興阿節制全軍翁同書亦係幫辦大員此時逆
匪紛竄固當趕緊攻剿揚州而萬福橋邵伯兩路兵力旣單尤應
分兵往助翁同書究係文員該大臣務當揀派得力武職大員前
往協同防剿仙女鎮兵勇爲數尙多該處距北路甚遠卽當飛速
調派扼要堵截萬不可以有用之兵置之無用之地沙頭東岸各
勇營盤據雷以誠等奏稱約有三千餘名是否足資防堵該大臣
等總當統籌大局嚴密分布毋再疏虞陳金綬雷以誠所奏各情
顯有捏飾已於摺片內嚴切批示著德興阿等仍遵前旨查明參
辦毋稍徇隱此次托明阿奏副都統富春總管西昌阿協領富明

阿參將成明等連日扼剿身先士卒斬擒極多著該大臣等查明據實保奏將此由六百里加緊諭知德興阿翁同書並傳諭文煜知之○諭和春福濟奏擒匪由豫回竄皖境請截留馬隊一摺前因揚州失守清淮兵單諭令英桂飛催伊興額等所帶馬隊一千名迅赴清江歸邵燦調遣以杜北竄門戶本日據托明阿奏揚州西北兩路各股賊匪分撲秦家橋蔣王廟薛家樓等處雖經官軍擊退而司徒廟七里甸一帶均爲衝要堵剿宜加嚴密並據文煜奏逆賊竄撲萬福橋窺伺裏下河我兵竭力奮殺該逆始敗回揚城該藩司等存勇僅止四百名勢難堵遏所奏危急情形較之皖省擒匪尤爲緊要伊興額等馬隊自應仍調赴清江爲揚州後路接應方能杜遏北竄蒙城宿州各擒匪已經鄭魁士等連次獲勝惟鄭魁士兵力尙單著和春福濟於廬舒軍營中酌量添撥精兵

以便乘勝擣其巢穴並飭鄭魁士等迅速殲除毋令蔓延其伊興額德昌馬隊官兵飛催迅赴清江毋稍遲緩至和春等片奏請提淮安府庫存款錢八萬串以充皖餉等語此時清淮正當調兵喫緊之時需用更繁此款萬難移解皖省王慶雲昨奏籌銀五萬兩委州吏目謝錫瑩管解已於二月二十七日啟程解往廬州大營交納和春等即可遣員迎提此後仍令該撫陸續協濟藉資給發將此由六百里加緊諭令知之○已革直隸提督陳金綬等奏兵食不敷久有解體之虞得旨軍餉不敷各處皆然安徽軍營數月未得餉者尙能屢殲逆眾方之揚營何啻天淵又奏托明阿退守沙頭三汊河營盤旋即失守批托明阿朱律喪師尙在彼極力挽回不似汝等逃避無蹤又奏請飭部嚴催原撥淮關等處餉銀解赴糧臺又批始終以兵餒餉缺資爲口實雷以誠何不自供平日

簣鼓以致軍心解體近又因作賀生辰漫無防範又奏吉爾杭阿
派兵渡江助剿見飭令暫紮沙頭一俟到齊卽當相機進剿又批
吉爾杭阿所派兵勇專爲救援揚城今雖無及自應迅催赴托明
阿等軍營何得擁爲自衛○幫辦軍務少詹事翁同書奏潰兵追
回無多見已激勵民團以遏北竄得旨所奏已悉鎮江援師及原
有兵勇除調撥外皆在裏下河實皆雷以誠畏賊如虎豫設三窟
見在屢有寄諭令德興阿會汝查辦朕看雷以誠昧良罔上如果
查實必應明正典刑斷不能念該員平日小有才稍從末減若使
該員倖逃顯戮不但無以振軍心朕亦何以策勵羣才耶又奏北
路難以周防請派重臣會剿或命邵燦扼守邵伯批邵燦若前駐
邵伯不惟無益必致政出多門○兩江總督怡良等奏英吉利司
稅李泰國呈請買辦火輪船以備剿逆見飭護上海道藍蔚雯隨

機辦理○命乾清門頭等侍衛蘊秀往揚州軍營交欽差大臣德興阿差委○予江西陣亡知府世焜等祭葬世職○辛未諭軍機大臣等廉兆綸奏江西支郡疊陷省城危急請速飭救援一摺前因文俊奏報吉安府城失陷當經諭令曾國藩文俊相機扼剿並諭令葉名琛等撥兵五六千名前赴江西交文俊調遣茲據廉兆綸奏撫州進賢東鄉安仁於二月二十三等日相繼失守是該逆已踰贛江而東延及饒境省城四面要害悉爲賊踞文俊等前派遮克敦布林福祥兩軍分援吉安撫州何以不飛速前進致賊勢愈形延蔓遮克敦布等所帶兵勇合之周鳳山彭玉麟劉子澤等水陸各軍爲數不少著曾國藩文俊督飭該副將等迅速擇要分投攻剿克保省城毋得再事株守致逆氛愈熾愈近無可措手廣信饒州兩郡爲該省完善之區未容再有疏失廉兆綸所請援兵

見已諭令王懿德等撥兵三四千名何桂清酌撥兵勇分投赴援
卽著曾國藩等飛催各該省援兵分別由建昌廣信等處前進旣
已保衛饒廣卽可援救省城其饒廣各屬要隘並著廉兆綸督飭
耆齡等就見有兵勇實力堵禦仍相機將安仁縣城速圖克復與
省城聯絡聲勢並將近日情形隨時奏報將此由六百里諭令知
之○諭廉兆綸奏逆匪自攻陷吉郡後撫州進賢東鄉安仁紛紛
失陷近復窺伺廣饒江省圍屬地方所在隔絕與省城聲息不通
等語江西毗連六省匪勢如此彼猖設省城復有疏虞東南大局
何堪設想呂佺孫於所屬各營汛內就近調撥精兵三四千名揀
派得力大員管帶迅速啟程由建甯取道廣信設法進攻以通要
路而保省垣至浙江之兵除各路派防外其節次調往江蘇安徽
者爲數已屬不少惟浙省與江省唇齒相依周起濱見在帶兵駐

紫衝州著何桂清酌量緩急迅飭該臬司就近進兵由廣饒一帶
援救江西毋稍延緩將此由六百里各諭令知之○壬申諭軍機
大臣等前因曾國藩等請飭羅澤南回軍援救江西並胡林翼奏
請暫畱羅澤南俟旬日以後再行派兵赴援當經諭令官文胡林
翼斟酌緩急辦理見據廉兆綸馳奏江西自吉安失守後賊復於
二月二十三等日連陷撫州進賢東鄉安仁各郡縣省城四面受
敵消息不通請速撥官兵援救並據何桂清奏報江西省城探聞
見已被圍等語江西壤地毗連六省形勢極關緊要見在逆勢彼
猖省城危急設有疏虞則東南大局豈堪設想此時籌撥援兵計
惟羅澤南一軍馳赴省垣庶危城可保著官文胡林翼酌量情形
如武漢賊勢實已窮蹙卽照胡林翼前請先派官兵數千名馳援
江西令羅澤南暫緩啟程以免功敗垂成若武昌急難克復則羅

澤南雖畱無益而江西省垣十分喫緊卽著官文等飭令該員統帶原有兵勇剋日啟程回援江省並設法迅速馳赴南昌毋稍遲緩致誤事機勇目詹起綸施紹恆等所帶各勇如此時正資攻剿則仍畱該大臣軍營調遣儘不能得力卽著官文飭令詹起綸等將所有義勇統帶前往河南交英桂軍營聽候調遣將此由六百里諭令知之○諭前諭令德興阿翁同書將此次首先失事營盤及陳金綬雷以誠退避情形查明參辦復因該革員等奏報各情顯有捏飾降旨諭令一併查參本日陳金綬雷以誠復具摺奏報初六日雷鳳翥禦賊獲勝各情節卽係前日文煜所奏之仗惟據雷以誠稱雷鳳翥獲勝後文煜始回仙鎮並未駐守本營又稱文煜扣餉不發以致兵心渙散且有聞警先逃調勇回保眷屬情事是否屬實著德興阿翁同書卽遵前旨秉公密查務將實在確情

據實具奏至所稱揚營兵將勇怯情形見在事機已失惟有嚴扼北竄力攻揚城豈能再任東西隔絕各顧一隅陳金綬雷以誠業經革職聽候查辦所帶兵勇卽著該大臣迅派大員接帶以資攻剿向榮吉爾杭阿派來赴援之兵應如何分撥布置亦著妥籌扼要處所防剿兼施嚴杜北竄將此由六百里各諭令知之○諭本日據英桂奏剿辦捻匪機宜並遵調各兵馳赴清江等語見在蒙宿懷遠一帶捻匪經鄭魁士連次獲勝可以漸就剿除而匪首老巢均在亳州必得有重兵專力攻剿方能絕其根株惟遽令移兵亳境又恐蒙宿等處零匪糾合鴟張著和春福清迅飭鄭魁士將蒙宿等處餘匪悉力殲除一路進攻駐紮亳境使該匪有所牽制不敢遠出肆掠豫省之兵由北路進攻該匪腹背受敵方爲得力至英桂所請另撥馬隊一千來豫助剿俟近調緩遠城等處馬步

隊官兵行抵東省時再行酌量緩急請旨調撥其伊興額等所帶馬隊一千名著英桂仍遵前旨迅催前赴清江暫交邵燦調遣將此由六百里各諭令知之○兩江總督怡良等奏署布政使楊能格辦理蘇省災歉頗能覈實惟與漕臣意見不符致漕臣有辦理每多掣肘之奏得旨邵燦未免受人慫恿惟處事尙公而見事不明○癸酉諭內閣前據御史李鶴年奏請採買奉天米石一摺經戶部議令該府尹等酌議章程勸辦捐輸茲據承志等奏稱奉天省自上年續開捐輸以來捐銀錢者頗形踴躍若又改令捐米恐人懷觀望轉無實濟自係實在情形著照所請所有奉天覓辦捐輸仍著專收銀錢毋庸並捐米石以昭畫一○諭托明阿奏請將玩視軍令之參將張維義等革職等語甘肅平羅營參將張維義經托明阿派往司徒廟一帶駐守於賊匪出擾時並不督兵堵截

竟率弁兵不戰而潰甘肅花馬池參將陳昇經托明阿派令招集潰兵兵丁已陸續歸伍該參將並不知去向似此畏葸玩誤僅予革職不足蔽辜張維義陳昇均著革職拏問交德興阿審明情節卽行正法以肅軍律○諭軍機大臣等前經疊諭德興阿翁同龢將瓜州首先失事營盤並陳金綬雷以誠有無退避捏飾情事及雷以誠奏參文煜扣餉不發各情查明具奏本日復據托明阿奏前因道途梗阻與東岸消息不通至初七日始探得陳金綬雷以誠在萬福橋舟次初八日官軍進攻揚城逆勢已屬不支若東岸早有布置於彼時派兵夾擊則無難立時克復文煜於截畱邵伯兵丁每名發給全餉一月其在揚隨剿兵丁口糧屢經催提僅解到銀一萬四千兩按名發給止敷五六成之數以致兵丁率多離揚就邵兵力更單未能進取等語揚州東路兵勇爲數不少當托

明阿等分投進攻之時何以陳金綬等並不督兵夾擊以致揚城
尙稽克復至兵丁口糧最關緊要文煜總理糧臺何以任意支發
多寡不均著德興阿翁同書將所奏等情並前次疊飭查辦各情
事一併查明據實具奏毋稍徇隱再據托明阿奏德興阿因連日
力戰致發嘔血舊疾該大臣見已身爲主帥總統全軍務須於奮
勉之中加以慎重以副委任將此由六百里諭令知之○諭前因
逆匪復陷揚城竄向運河兩岸節經諭令邵燦力籌扼要堵禦本
日據庚長奏馳抵清江接印並分籌南北兩路防禦情形一摺清
江距揚城較近運河東西水路可通蔣壩淮安等處見在瓜儀一
帶盡係賊巢清淮一帶兵勇無幾其汙港紛歧可通舟楫處所在
在可虞庚長見已到任所有清江防守事宜責無旁貸著會同邵
燦籌商堵禦機宜凡清江以南清江以北水路扼要處所均須妥

爲設防不可稍涉大意其徐州捻匪尤須防其與逆匪乘勢勾結
嚴密盤查是爲至要將此由六百里各諭令知之○直隸總督桂
良奏磁州等處土匪滋事見飭查拏得旨著速行查辦不可任其
蔓延○予江西陣亡協領奇成額祭葬世職○乙亥諭內閣恆春
蔣霽遠奏特參督辦不力之道員請旨懲辦一摺貴州貴東道承
齡查辦清水江一帶匪徒有苗教各匪徑趨紅巖渡口分股鈔出
兵練之後以致兵練驚潰退紮貓場實屬調度無方承齡著卽革
職仍畱營效力以觀後效○諭蔣霽遠奏司道各府年終考語請
展限具奏一摺各省督撫每屆年終將所屬司道等出具考語密
行陳奏甄覈所屬吏治攸關卽使該省見在辦理軍務道府率多
署任而於見任司道各員平日居官政績儘可隨時考察繕摺密
陳何得以軍務未蒞遽行展限所請著不准行○諭蔣霽遠孝順

奏勦辦思南石阡餘匪生擒匪首一摺貴州思南石阡二府前經
官軍克復後匪首毛大先等尙竄逃未獲正月二十等日署知府
福奎等於邵家橋等處勦賊踏毀賊營三座先後斃賊一千八百
餘名共生擒二百四十餘名內有僞將軍李春貴等十三名奪獲
礮械甚多其龍泉縣桶口之匪經署知縣陳世鑣等於正月十九
等日勦斃五百餘名生擒僞將軍李老七等十八名僞先鋒謝池
澧等二十八名嗣匪首毛大先竄至江陽縣一帶地方經候補同
知王敬烈等管帶兵練往勦將毛大先及攻破思南之逆匪楊斗
洪等四人一併擒獲奪獲旗幟礮械多件又捕得攻陷石阡之逆
匪李春等八名俱分別正法見在該處匪黨改悔投誠者已六七
千人惟銅仁匪首徐廷杰是否業經殲斃仍著蔣霽遠等嚴飭在
事員弁迅速追捕以清餘孽○諭軍機大臣等本日據陳金綬雷

以誠奏江南兵勇到齊駐紮灣頭圖攻揚州一摺又片奏托明阿不察虛實謂東岸並無兵勇請飭訪查等語見在向榮吉爾杭阿所派兵勇均已渡江助剿陳金綬等令鄧紹良與張翊國均駐灣頭並派勇分駐黃泥溝等處所稱邵伯爲東北後路無庸留兵該處爲糧臺重地亦難漫無防範至因兵力尙單飛咨向榮吉爾杭阿再添精兵渡江助剿一摺金陵鎮江防剿亦屬喫緊業經派撥二千餘名來揚協剿若再行添調該處兵力愈形單弱剿辦豈能應手著德興阿等查看情形如兵勇不敷分布卽飛咨邵燦庚長將伊興額等馬隊及見調之直隸陝西山東各官兵內酌量分撥以期助剿畱防兩無貽誤至所稱此次各勇尙知畏懼未敢擅退托明阿遠在西路不察虛實竟謂東岸並無兵勇以致請領口糧文煜據托明阿行知僅發錢三千串等語瓜州逆匪竄撲運河兩

岸衝破營盤疊據文煜托明阿先後具奏何以陳金綬雷以誠奏稱西岸各營全被賊毀東岸勉力支持並未一律潰散賊撲三汊河營盤該革員等並未派兵接應全行退至沙頭此等情形與潰散何異如果平時軍律嚴明何至遇賊輒退著該大臣等將所奏各情秉公查明據實具奏正在寄諭閒據翁同書馳奏揚城業已收復又據托明阿奏金陵逆賊數千直撲江浦縣城旋即失陷各一摺見經托明阿派撥兵勇卽飭鄧紹良武慶迅圖克復城池及水師扼截江面杜賊續竄之路逆匪見在逃往何處該大臣務卽偵探明確迅速兜擊毋令肆行奔突惟江浦毗連皖境深慮該逆意圖北竄已諭令和春福濟派撥官兵馳往堵截並諭邵燦庚長探明賊蹤相機防剿所有揚州之賊竄往何路武慶之兵曾否接仗及該縣文武下落均著確切查明迅速具奏翁同書謝恩摺內

瀝陳各情覽奏已悉該少詹事已有旨幫辦軍務卽責無旁貸惟當與德興阿勦力同心勉圖振作毋得畏難自阻豫存推諉之見致負委任將此由六百里加緊諭令知之○諭昨因清淮一帶防務喫緊諭令邵燦庚長會商堵禦機宜於清江南北水陸要隘均須妥爲設防本日據托明阿馳奏六合縣溫紹原稟報金陵逆匪數千於初十日直撲江浦縣城兵勇接仗因眾寡不敵旋即失陷雖已據托明阿移咨鄧紹夏帶兵赴江浦勦辦復分派將領駐兵六合儀徵等處扼要堵截惟賊勢蔓延彼猖已極北竄甚屬可虞且恐與徐州捻匪勾結辦理更形棘手前疊諭催令伊興額等馬隊並直隸山東陝西官兵迅赴清江此時諒已陸續可到著邵燦等卽會商遣調探明賊蹤所在何處喫緊卽往何處策應斷不可專以防守清江爲事稍事拘泥致滋貽誤再本日又據翁同書奏

揚州已於十三日克復惟此股賊匪竄往何處尚未具奏並著邵
燦等迅卽確探情形相機堵剿隨時奏報以慰廛念將此由六百
里加緊諭令知之○諭托明阿奏江浦失陷並翁同書奏揚城克
復各一摺揚州於十三日攻克其詳悉情形尙未據德興阿奏到
而江浦被陷係初十日事據稱由金陵出賊數千我兵眾寡不敵
以致縣城失事江浦地連皖境不但和州含山一帶賊蹤恐被勾
結若該逆竟從滁州天長等處衝突則北竄大有可虞且天長緊
接揚州亦恐其與瓜揚逆黨竄合致剿辦更形掣肘此時惟有由
廬舒揀發勁旅以資堵截本日已據托明阿奏令鄧紹良前往赴
剿並飛咨和春等抽撥官兵二千名及吉連步隊會剿等語著和
春福濟迅卽就近選派精兵委令得力統兵大員管帶探明賊蹤
馳往江浦毗連之地極力遏其北竄使逆匪不至蔓延肆擾其臨

准正陽各關隘均爲北路要途並著節節嚴密布置該提督等斷不可稍分畛域仍以無兵可調爲詞致誤大局自干重咎將此由六百里加緊諭令知之○以捐輸軍餉再永廣浙江鄉試中額二名餘姚縣學額三名山陰會稽各一名商學八名慈谿十名歸安烏程各六名平湖五名秀水鄞縣各三名鎮海二名海甯嘉興嘉善石門長興德興諸暨嵊縣西安永嘉各一名○丙子向榮奏總兵張國樑回抵龍潭卽派兵添紮各營乘勝往襲三汊河冒雨進攻賊欲逃竄回城張國樑設伏以待該逆果於大雨之際棄壘竄逃張國樑率同副將蔡應龍等奮力追擊各路伏兵齊起俘斬數百奪獲大礮槍械無算該逆拌死潰竄江邊當將三汊河張楊村各壘踏毀連夜跟蹤追剿所有石埠橋棲霞各賊亦紛紛逃潰經秦如虎等繞路截殺張國樑由後追擊臣復商令署將軍福興督

軍接應餘匪盡棄槍礮輜重由觀音門沿江一帶遠逃被我兵追
偪撲河淹溺無數所有三汊河棲霞石埠橋一帶卽日肅清起獲
米糧火藥甚多生擒賊匪二百餘名張國樑統領調遣旬日間殺
賊不下一萬餘眾盡掃逆壘南岸一律肅清雖該總兵調度有方
而各軍踴躍用命著有微勞仰懇 天恩准予擇尤併案保奏

上諭內閣金陵匪黨分股內撲疊經向榮派令總兵張國樑等營
兵進剿將沿江賊壘盡行燒毀南路一律肅清在事員弁奮勇可
嘉著向榮擇其尤爲出力者併案保奏候朕施恩○諭軍機大臣
等昨據托明阿奏金陵賊匪撲陷江浦縣城本日據向榮奏攻剿
三汊河棲霞石埠橋一帶賊壘踏毀南岸肅清聞賊船多隻於初
十日由上河新江口登岸竄撲江浦援軍不及城池失陷十二日
探報浦口又有失守之信已檄張國樑督同李發榮蔡應龍各兵

勇二千四百名前往攻剿昨閱托明阿奏報有飛咨鄧紹良馳往會同武慶克復之語見在鄧紹良等甫經攻克揚城於城外寶塔灣等處扼要駐守正當令鄧紹良移得勝之師將桂花莊三汊河各賊營次第攻剿以圖進取鄧紹良著仍留揚州助剿毋庸他往江浦地處要途武慶係在浦口督辦大員是否接仗失利抑或先期退避所有失事各情及文武下落仍著德興阿等確查具奏昨已諭令和春等迅速添撥精兵遏賊北竄今金陵南岸官軍疊次得手若江浦浦口不即攻復設有蔓延不但天長滁和含山均可衝突且慮與瓜賊北岸通聯向榮既已派張國樑往援德興阿身爲統帥仍當南北兼籌水陸並扼飭令水營將弁於沿江一帶通達浦口之路實力堵禦毋任蔓延將此由六百里加緊諭令知之○諭前因江浦失陷賊勢蔓延諭令邵燦等探明賊蹤所在何處

緊要卽撥兵策應本日據庚長奏截剿徐州賊匪獲勝並清淮守禦情形所稱徐州賊匪屢受懲創必糾合大股意圖復逞擬俟率派兵到酌撥一旅赴徐自爲會合兜剿之計惟疊諭直隸山東等省迅派官兵馳赴清江原爲高寶清淮最關緊要必須重兵駐守以資防剿若撥赴徐州則揚州後路仍屬兵單見在揚城雖已克復而此股賊匪竄往何處尙未據德興阿等具奏況江浦失陷北竄更屬可虞邵燦等仍當遵奉前旨相機堵剿所有伊興額等馬隊及直隸等省官兵到時應調何處仍當酌量緩急奏明請旨一面仍嚴飭傅振邦等就見有兵勇竭力剿辦不得守候客兵轉致遷延時日至徐州捻匪被剿後見竄何處並著該漕督等確探情形隨時奏報將此由六百里諭令知之○欽差大臣德興阿奏祇領關防日期得旨汝忠誠勇敢朕甚嘉悅惟旣爲統帥總以事料

機先爲要務打仗衝鋒自有將佐雖滿洲舊俗以不能奮勇爲恥
要不作無謀之勇也○丁丑諭內閣德興阿等奏截剿竄匪收復
揚城一摺逆賊竄踞揚城後因官軍疊次痛剿亟思竄逸向薛家
樓一帶繞撲德興阿親督西昌阿等馬步各隊分路迎擊直搗中
堅轉戰多時賊勢披靡回遁惟時城內逆賊紛紛出城接應當派
富春等帶隊馳往附城左近斷賊歸路其竄回賊眾經官軍斬殺
大半鞠殿華等進城搜剿餘匪卽將郡城收復此時揚城失陷雖
經官軍卽時克復而賊蹤尙在附近各鄉莊藏匿隱伏著德興阿
等督飭將弁設法搜剿毋稍延緩○胡林翼奏二月二十五日知
府李續賓等移營窯灣二十六日進攻塘角賊匪伏於草塢民房
暗施槍礮李續賓縱火焚賊茅屋斃匪無算道員羅澤南率同知
蔣益澧等直攻小龜山知府銜唐訓方率勇至山尾截擊賊匪大

敗連日堅閉不出惟於城上施放槍礮三月初二日因九江等處賊援大至該逆分門出撲羅澤南派都司何紹彩等分投迎勦賊眾大潰我軍乘勝窮追賊已大半入城餘賊五六百人閉於城外盡爲我勇殲殺城上槍礮如雨羅澤南立馬城門左額中槍子血流衣帶猶駐馬不移賊亦不敢再出其撲李續賓營盤之賊亦爲官軍分路截擊陸路之賊大敗官軍追至城濠通計殺賊約二千人生擒五十餘名是日羅澤南受傷甚重至初八日身故當派知府李續賓由窯灣仍回洪山總領其軍數日之內賊復於保安門外添築新壘三座臣與李續賓密計及其初成全力破之遂於初十日派周得魁等分三路圍攻立將賊壘攻破壘中守賊百餘人悉行殲戮城中之賊復分路來援兵勇卽於城濠之外整隊以備賊而以百餘人毀平其濠壘更番接戰斬獲甚多賊勢大挫遂將

新砌之壘及長濠六道一律毀平此次陣亡之外委陳達清曾玉蘭唐訓得應請照把總例從優議卹文童鍾近衡鍾楚池王嶽峯應請照從九品例從優議卹其餘打仗出力員弁兵勇可否懇

恩彙案請獎

上諭官軍剿賊獲勝破賊新壘三座著胡林翼督

飭李續賓等激勵諸軍乘勝克復堅城毋稍遲緩陣亡之外委陳達清曾玉蘭唐訓得均著照把總例從優議卹文童鍾近衡鍾楚池王嶽峯均著照從九品例從優議卹此次出力員弁兵勇並准其彙案保奏候朕施恩○胡林翼奏布政使銜浙江甯紹台道羅澤南以諸生講學宗法程朱其所著小學韻語諸書體用兼備洵堪輔翼名教咸豐二年賊犯長沙卽倡率生徒辦理湘鄉團練忠義至性感動鄉里遂率其鄉人效力戎行轉戰湖南江西湖北等省克城二十大小二百餘戰每言首逆踞金陵則武漢爲必爭之

地且南北樞紐亦以武漢爲最要自上年圍剿以來力攻九十餘日督催至嚴雖水陸弁勇中傷已過三千人而忠義之氣不容稍懈初二日帶傷甚重血沾衣帶尙能指畫戰狀臨危時總以武漢未克爲恨言不及私該員之父羅嘉旦年八十一歲長子羅兆作次子羅兆升均應童試合無仰懇 天恩俯准將羅澤南照二品陣亡例加等賜卹並於湖北江西設立專祠其湖南湘鄉縣本籍請建之惠義祠卽作爲羅澤南專祠所有該縣陣亡之士民弁勇一併附祀以妥忠魂 上諭布政使銜浙江甯紹台道羅澤南以在籍生員倡率生徒辦理團練嗣因楚省賊氛猖獗率其鄉人自效戎行轉戰湖南江西湖北等省大小二百餘戰克城二十朕嘉其忠義奮發屢著偉績由訓導超擢道員加布政使銜方冀其攻復武漢殄滅逆氛克膺懋賞茲因攻剿武昌乘勝追賊直逼城下

受傷殞命覽奏之餘深堪憫惻羅澤南著加恩照巡撫陣亡例賜卹伊父羅嘉旦著賞加頭品頂帶伊子羅兆作羅兆升均賞給舉人一體會試以示朕褒卹蓋臣至意並著於湖南本籍及湖北江西地方建立專祠其湘鄉縣士民弁勇打仗陣亡者著一併附入羅澤南本籍專祠以慰忠魂尋予祭葬世職諡忠節○諭軍機大臣等德興阿等奏截剿竄賊收復揚城一摺揚城業經收復而官兵爲數尙少未能兼顧守禦賊蹤距蔣王廟仍不過里許大營三面受敵鄧紹良援師見駐灣頭自應移緩就急先行馳赴大營協力助剿始可制勝該提督久經戰陣熟悉賊情自必能操勝算著卽與德興阿等統籌全局何處情形喫緊卽當撥兵前往堵剿前調山東兵一千名及伊興額等馬隊一千名計此時可抵清江著德興阿等行知卽燦庚辰迅調來揚將薛家樓三汊河一帶賊黨

次第勦除陳金綬雷以誠所帶兵勇前已諭令德興阿另派大員接管如尙未委派有人著暫令陳金綬雷以誠在萬福橋等處駐紮托明阿並著畱於德興阿軍營效力以贖前愆再昨據陳金綬雷以誠奏稱攻勦獲勝會同鄧紹良收復揚城各情與本日德興阿等奏報所稱城內各門未見他處兵勇接應之語情節不符著德興阿等與前次交查各件一併查明具奏原摺著鈔給閱看將此由六百里加緊諭令知之○命陝西提督鄧紹良在欽差大臣德興阿軍營幫辦軍務○予江西陣亡佐領廣善等祭葬世職○戊寅諭內閣德興阿奏浦口失事情形見籌會勦等語浦口爲江北要衝逆賊大股分撲總兵武慶駐守日久屢著戰功此次由江浦撤兵盡力迎勦雖因眾寡不敵以致失利究屬疏防咎有難辭武慶著革職畱任以示薄懲見經德興阿派令穆克登額帶領馬

隊馳往六合與向榮所派總兵張國樑等兵赴浦救援仍著德興
阿督飭武慶等會合進剿迅圖克復○諭軍機大臣等何桂清奏
江西軍情緊急見籌防事宜並廉兆綸奏信饒危急各一摺該
逆因我軍扼守貴溪分竄餘千萬年樂平德興等縣並由撫州分
股於二月二十八日攻陷建昌郡城賊勢蔓延朕心實深焦灼何
桂清所稱株守邊防不如進援鄰境自宜如此辦理廉兆綸請飭
浙省兵勇由玉山前進先保廣信以通省垣及饒州之路亦爲急
援要著該撫見已飭饒廷選統帶閩兵駐常山曹城一帶調富勒
興阿統帶衢州兵勇堵禦開化白沙關一帶固足以保浙省門戶
並著飛催各路官兵到齊卽速由玉山直出廣信節節進剿前有
旨令王懿德等迅撥精兵三四十人由建甯取道廣信並據向榮
吉爾杭阿奏抽派秦如虎虎坤元等帶精銳兵勇一千名由浙赴

援廉兆綸仍當激勵民團藉資鎮壓至江西省城聞有被圍之信
見在賊氛梗阻著廉兆綸設法繞路詢悉省垣消息並著何桂清
派員偵探近日情形飛速奏報以慰廑念前吏部侍郎萬青藜籍
隸江西人地較爲熟悉所有三衢廣饒一路防剿事宜卽著該侍
郎會同晏端書督飭將弁相機妥辦將此由六百里加緊各諭令
知之○諭江西自臨江瑞州袁州吉安失守後賊勢日益猖獗據
廉兆綸何桂清先後馳奏該逆復於二月二十三等日攻陷撫州
府城並連陷進賢豐城東鄉安仁等縣有分股圍攻省城之信周
鳳山在樟樹鎮堵剿聞有挫失羅澤南一軍本令俟克復武昌卽
行返旆同援江西乃昨據胡林翼奏該道竟於初二日偪賊城下
額中槍傷旋卽身殞江西情形危急已極必須急集援師劉長佑
之軍雖經收復萍鄉而萬載一帶賊匪尙多恐難直抵袁州閩廣

浙江應援之師調撥亦需時日因思湖南南境業已肅清選用道王鑫帶勇素稱得力著駱秉章添撥兵勇飭令該員由茶陵州進剿蓮花廳吉安府一帶以爲劉長佑後路策應降調湖北藩司夏廷樾因病告假聞在長沙就醫業已痊愈前郴州知州朱孫詒丁憂後尙在湖南省該二員均籍隸江西若令協帶兵勇赴援能否得力並著駱秉章查明具奏將此由六百里諭令知之○和春福濟奏捻匪竄徧懷遠縣城鄭魁士等督率兵勇竭力固守三月十一日該匪自渦河南岸至淮河西岸繼擁撲營我軍槍礮齊施斃匪甚多該逆西南一股拌死越我牆壕參將福坤遊擊柏雲章都司冉廣興守備朱介福在營血戰力竭陣亡鄭魁士衝入賊隊徧體受傷昏暈倒地隨護兵丁冒死力擊幸將鄭魁士搶回而西北一股又從渦河一帶來撲均經我兵奮力衝殺追逐二十餘里斬

獲首級二百餘顆賊眾敗退此次擒眾兵單營盤被毀鄭魁士身受重傷死生莫必其參將塔思哈都司阿克敦已革直隸州知州徐曉峯守備王新桂未知下落兵勇傷亡潰散約共千人匪勢猖獗至於此極見在懷遠尙紮四營兵勇不過千餘已飭遊擊俞應彪暫行督辦一面迅派大員帶領多兵馳往援剿並令鄭魁士趕緊醫治冀其就痊所有陣亡之參將福坤等應請旨飭部照陣亡例從優議卹又奏粵逆闖入揚州若由滁州天長竄入臨淮與捻匪勾結關繫大局深爲可虞亟應先事豫防以杜竄越見在鄭魁士受傷甚重亟望救援尤須添集重兵趕緊剿辦臨淮懷遠相距咫尺駐守臨淮與攻剿懷遠實可聯絡一氣查總兵珠克登郝光甲所帶陝甘兵二千餘名與其合剿桐廬未能剋期得手不若先令防剿北路與遊擊俞應彪等懷遠各營及廬鳳潁道張光第等

臨淮兵勇併爲一軍益增聲勢至豫省擒匪見已回竄皖境歸德一帶情形已鬆應請旨飭令英桂速帶兵勇急攻雒河老巢以牽匪勢上諭和春等奏遵旨布置臨淮防堵並籌剿擒匪一摺據稱扼守臨淮與攻剿懷遠實可聯絡一氣該提督等已令總兵珠克登郝光甲帶陝甘兵二千餘名與遊擊俞應彪等懷遠各營及張光第等併爲一軍見在鄭魁士受傷甚重塔思哈徐曉峯等不知下落擒匪勢甚鴟張我兵僅約千人而匪眾已逾數萬雖已令英桂催督前隊迅擣雒河集並諭該撫親自越境督剿惟鄭魁士所統之軍已經失利該總兵受傷未愈須派得力大員協同統帶著和春福濟於珠克登郝光甲內揀派一員酌分兵力前赴懷遠該處與臨淮關隘相距甚近既可壯北路藩籬並可攻剿擒匪以遏兇鋒所請借撥南河道庫銀二萬兩已諭庚長如數撥解該提

督等即可派員迎提以資支給至參將塔思哈等如何下落並著
和春福濟查明具奏將此由六百里加緊諭令知之○諭本日據
和春福濟奏遵派大員帶兵赴臨淮防剿並請飭令英桂急攻雉
河集賊巢一摺皖境匪勢猖獗亟應厚集兵力迅圖殄滅英桂前
奏各路剿匪均尙得手正宜乘勝督兵自北而南節節進剿雉河
集爲該匪老巢若我兵直抵該處奮力進攻必可以牽制賊勢英
桂督辦三省剿匪事務責無旁貸著卽馳赴皖豫交界處所扼要
駐紮就近調度並揀派得力大員帶兵赴皖與鄭魁士等合力剿
捕爲一鼓殲除之計袁甲三諒已馳赴軍營該撫啟程後歸德一
帶防剿事宜卽飭袁甲三妥爲籌辦毋稍疏虞英桂馳抵歸德已
逾兩月各路兵勇計已陸續到豫若株守郡城致該匪蔓延爲患
師老餉糜貽誤之罪恐難寬宥也將此由六百里加緊諭令知之

○諭和春福濟奏皖營餉竭懇請就近酌借南河庫項應用等語據稱見須援剿懷遠派防臨淮徵調之師因無糧可裹不能趨行擬於南河庫項所存三萬餘兩內就近酌借二萬兩專員飛提以作行糧自爲移緩就急之計著庚長接奉此旨迅卽於南河庫項如數撥借以便皖省派員來提藉資餉糈以速軍行將此由六百里諭令知之○諭官文奏請飭催各省奉撥軍餉等語前因湖北武漢水陸各軍需餉較繁飭令山西陝西按月各添撥銀二三萬兩四川省按月籌撥銀五萬兩以資接濟見在武漢攻剿喫緊各營欠餉過多自應源源撥解俾免缺乏著黃宗漢按照奉撥數目仍再籌款按月解往其陝西省應解月濟楚餉並著吳振械迅速籌撥山東指撥漕糧變價一款爲數無多卽著崇恩如數起解總期毋誤軍需是爲至要將此由六百里加緊各諭令知之○先是

烏里雅蘇台將軍奕相等奏變通科布多屯田章程請將原派屯兵二百五十戶擬裁撤五十戶卽由所畱二百戶內之壯丁熟悉屯務者挑選五十戶抵補所裁之缺以符原額下軍機大臣會同理藩院議至是奏應如所擬辦理惟此項屯兵二百五十戶係由土謝圖汗部落額設一百二十五戶三音諾顏部落額設八十戶扎薩克圖汗部落額設四十五戶前此出派額既不同此次所裁之五十戶亦應均勻分撤以昭平允從之○予安徽陣亡參將福坤等祭葬世職○庚辰 穆宗毅皇帝生 上之長子也 母懿嬪今 慈禧皇太后○諭軍機大臣等前有旨諭令德興阿等行知邵燦庚長將前調山東兵及伊興額等馬隊迅由清江調至揚營堵剿賊匪本日據翁同書奏請將前調往清江駐紮之兵催令悉赴揚州等語著邵燦庚長仍遵前旨將前調山東兵一千名及

伊興額等馬隊一千名俟抵清江卽迅速飭令前赴揚營其前調陝西駐防官兵一千名著一併飭令前赴揚營歸德興阿等調遣以期厚集兵力清江爲南北要衝徐州一帶捻匪未就肅清防堵尙形緊要所有前調直隸防兵一千八百名著仍畱於清江歸邵燦庚長調遣將此由六百里加緊各諭令知之○辛巳內閣欽奉

上諭 懿嬪晉封爲 懿妃○曾國藩文俊奏臣等探聞石達

開由吉安回竄臨江帶賊船二百餘號屯踞永泰地方又探得臨郡賊匪由沙湖渡至東岸欲分三路來襲二月十三日至樟樹鎮河邊游探經彭玉麟督率水勇轟擊其隄上之賊亦被陸軍擊退十四日副將周鳳山約會水師進剿橫梁自督諸軍堵擊橋上之賊彭玉麟復令水師登岸協剿斃賊數百名橋上及隄左之賊同時敗潰我軍會合追剿直抵橫梁奪獲槍礮刀矛多件共殺賊七

八百名十六日石逆率眾數萬分踞橫梁香溪一帶周鳳山約水師分路馳擊斃賊多名陸軍進逼香溪猝遇賊之大股賊分四隊占踞山坡都司滕國獻等由右衝擊賊已敗退山左復出賊一股守備岳炳榮等不能抵敵滕國獻等率右路之勇回隊堵截傷亡不少十八日賊匪四路前來撲營參將阿達春等抵禦東北李清華等抵禦西南岳炳榮等在後接應時西路隄邊彭玉麟已派礮船幫同轟擊兩處各斃賊匪多名其西南逆賊見東北賊敗遂繞向東路鈔在我軍之後岳炳榮等力難擋住逆賊乘勢緊逼致西南路各營不能兼顧傷亡兵勇幾近千人營盤全失此次剿賊失利應請旨將副將周鳳山守備岳炳榮卽行革職
守備銜千總黃玉芳革去守備銜周鳳山黃玉芳仍留營效力並請將臣曾國藩交部議處至陣亡之前任湖南知縣馬丕慶請開復原官照知縣

例從優議卹訓導林長春府經歷李清華均交部從優議卹其餘

傷亡兵勇容

臣

等查明照例辦理又奏

臣

等據探撫州府城於二

十二日失陷該郡與廣信接壤而廣信又爲奏報進京浙江轉餉之路關繫緊要見調湖口李元度一軍進剿撫州以保廣信調青山水師退紮吳城鎮青山陸軍調赴省城上年九江湖口水陸萬餘人令全數撤入內地目下所望以挽回全局者在內惟李元度一軍在外惟羅澤南劉長佑二軍袁臨之路久梗劉長佑迄無入境確耗其羅澤南一軍及廣東防剿贛州之師請旨再行飭催迅速來江援剿浙閩兩省與廣信建昌毗連請旨飭下該省督撫嚴密防堵以免賊匪竄越

上諭

廣東羅定協副將周鳳山於克復樟樹鎮後不乘賊匪未集速攻臨江乃敢遷延瞻顧致該逆大股麇至鈔襲官軍後路旋有挫失實難辭咎守備岳炳榮守備銜于

總黃玉芳接應不力亦屬咎有應得周鳳山岳炳榮均著卽行革職黃玉芳著革去守備銜周鳳山黃玉芳仍著畱於軍營以觀後效儻再不知愧奮卽著嚴參懲辦曾國藩調度失宜著交部議處○諭軍機大臣等曾國藩文俊奏袁臨路梗請催楚粵援兵並飭閩浙兩省嚴密防堵等語江西省賊勢蔓延疊據何桂清廉兆綸奏報饒州各屬均有賊蹤建昌亦已失守則省城四面皆形梗塞不僅袁臨一路前此諭令葉名琛等撥兵五六千名由贛州一路進剿本日復有寄諭嚴催計日當可啟程劉長佑一軍於二月十二日克復萍鄉縣城進攻萬載恐其孤軍深入後路無援復諭知駱秉章添派兵勇飭道員王鑫帶往策應並令酌派夏廷樾朱孫詒二員協帶兵勇赴援亦可陸續趕到饒廣一路已允何桂清所請令萬青藜督辦防剿除浙江本省防兵外由鎮江調回師長鎮

夏寶慶各勇一千四百餘名由金陵各營派出秦如虎等兵一千三百餘名均可由浙前進撫建一路當廉兆綸等奏報之時已諭知王懿德等派兵三四千名由建甯一帶進援冀可保衛廣信兼顧建昌見在該侍郎等將九江湖口水陸各軍全數撤回舍長江而專顧內地亦屬萬不得已之計但必須迅速設法使各省援兵能與本省兵勇相接方可次第剿辦若內外隔絕聲息不通援兵雖已漸集省城終屬孤懸大局何堪設想著曾國藩文俊妥爲調度其援兵較遠省分卽著繞道催提一面酌量撥兵疏通道路俾近省先到之兵得以迅速會合不可束手坐困致誤事機至武昌回援之軍前已屢次諭催詎意羅澤南遠爾陣亡新易主將且武昌此時攻剿正在喫緊本日復諭催胡林翼迅圖克復以便李續賓回援江西曾國藩等自應先就青山調回之兵爲力保省垣之

計未可專恃此軍致成株待也再前據駱秉章奏江西失陷各郡千餘里內無一官一兵似此情形卽官軍克復城池過後必爲土匪竊踞軍行仍多後顧之慮著曾國藩等轉飭帶兵各員遇有克復地方卽由軍營派員暫爲管理令其撫輯難民辦團守禦庶文報往返餉需轉運皆可逐節疏通不至有旋得旋失之患將此由六百里加緊諭令知之○胡林翼奏石達開於上年秋間由湖北竄入江西又益以本境土匪賊勢益熾二月十六日周鳳山以眾寡不敵全軍失利不特江西全局震動卽南服數省亦岌岌難支湖南選派五千人由東路赴援而江西西路州縣淪陷俱有大股賊匪阻截道路非節節搜剿不能前進曾國藩前次急調羅澤南回援是尙未悉羅澤南陣亡之事見在江水僅長五六尺春汛初起當可望其速漲羅澤南自帶之一千六百人新失主將必須慎

選將弁派令專管以歸李續賓統帶

臣

前議分軍數千人往援江

西此時羅澤南身故無將可分情形固已不同且剿辦大股賊匪

非三四人所能濟事曾國藩撤調南康青山水陸各軍回援江

西省城下游賊援接踵上竄

臣

所轄武昌邊境盡與江西州縣毗

連賊蹤滋蔓道途梗塞援軍深入必須多攜軍火錢糧乃免匱乏

臣

等再四思維惟有水陸力攻決期進剿如卽時克復誠爲善計

萬一久頓城下卽以李續賓等全軍赴援方爲妥善

上諭胡林

翼奏密陳南岸賊情並籌議援剿江西情形一摺江西自臨江瑞

州袁州吉安失守復連陷撫州建昌等府城並進賢豐城東鄉安

仁等縣情形萬分喫緊本日據胡林翼奏羅澤南見已陣亡武漢

如能迅速克復卽可派兵回援萬一久頓城下卽令李續賓一軍

前往等語李續賓著畱於湖北俟武昌克復後再行帶兵回援江

西惟該大臣等節次奏報總以克復在即爲詞朕心竇深殷盼若徒以粉飾之詞遷延時日是武漢旣不能克復而江省復不能回援糜餉老師豈非兩失著官文胡林翼督飭水陸諸軍將武漢剋期克復毋得再有遷延致滋貽誤將此由六百里諭令知之○諭前因江西省賊勢蔓延疊諭葉名琛等撥兵赴援嗣據廉兆綸等奏報吉安府被陷以後撫州建昌東鄉進賢安仁等郡縣先後失守本日復據留國藩等奏稱各路悍賊畢集周鳳山所統兵勇於樟樹鎮挫敗請催廣東奉調官兵速行赴援等語江西壤地毗連六省形勢極關緊要見在各郡縣相繼淪陷南昌孤危非四路援兵迅速前進不足以分賊勢而保危城著葉名琛柏貴將前諭調赴江西精兵五六千名飭令剋日啟程馳赴贛州奮力進剿並將所需軍餉寬爲籌備源源接濟無許稍涉遷延致滋貽誤並將該

官兵啟程日期卽行馳奏將此由六百里加緊諭令知之○予江西陣亡知縣馬丕慶等祭葬世職○以籌備糧儲予直隸總督桂良等優敘○釋遣成大學士賽尙阿罪交署察哈爾都統穆隆阿差委○癸未諭內閣和春奏貴州巡撫蔣蔚遠咨送會彙仍行移回未經畫奏等語各直省督撫會奏事件例應公同商議會列前銜惟見在辦理軍務省分或督撫駐紮相距較遠往返商酌必致有誤事機嗣後如遇軍務緊急事件准各該督撫單銜具奏無庸會銜其餘事雖緊要尙非急迫及尋常事件仍照例會銜以昭覈實而符定制○甲申德興阿奏灣頭等處分兵布置得旨一切布置情形尙屬周妥○予江南陣亡佐領富勒布等祭葬世職○丙戌諭內閣德興阿翁同書奏官軍踏平六合賊壘克復浦口一摺張國樑自六合拔營追賊直逼浦口該逆拚死抗拒本月初八日

武慶張國樸等馬步兵勇同時齊到分路進攻合力痛洗計殺賊千餘人落水淹斃者無數次日官軍全抵城下逆眾驚惶奪門四竄均被兵勇截剿復斃賊八九百名卽將浦口克復維時葉常春等艇師在浦口江面截殺竄賊搜擒殆盡訊據賊供僞尙書雷天佑等二十餘名均被殺死見在武慶等卽日進攻江浦縣城著德興阿等嚴督將弁乘勝剿洗勿畱餘孽○諭軍機大臣等前有旨諭令邵燦庚長將前調山西陝西官兵及伊興額等馬隊迅由清江調至揚營堵剿賊匪並令將前調直隸防兵仍畱清江以資扼守本日據德興阿翁同書奏揚營兵力過單西路地勢平行瓜鎮賊黨往來勾通裹脅防不勝防竄眾寡不敵等語見在揚城已復清江遠在上游防堵情形尙不至十分喫緊而揚儀賊氛較熾亟應厚集兵力著邵燦庚長仍遵前旨將前調山東兵一千名陝

西駐防官兵一千名俟抵清江卽迅速飭令前赴揚營其直隸防兵一千八百名著一併飭令前赴揚營歸德興阿等調遣至浦口見經克復武慶已帶兵進攻江浦著卽飭張國樑帶兵由六合直趨儀徵迎擊並相機就近會同揚營新調各兵併力剿洗三汊河一帶賊壘以期迅速掃蕩本日又據英桂奏鄭魁士勦辦懷遠一帶捻匪身受重傷兵力過單惟恃伊興額等馬隊一軍攻勦得力軍情變幻靡常自應揆度時勢先其所急見已諭知英桂將前調伊興額德昌所帶馬隊一千名暫畱該處助勦此項馬隊如已行抵清江著邵燦庚長飭令迅速折回懷遠一帶協同鄭魁士會勦將此由六百里加緊各諭令知之○諭英桂奏勦辦歸德附近捻匪漸盡移兵進剿雉河賊巢並請畱馬隊官兵一摺前因鄭魁士懷遠失守諭令英桂移兵進攻雉河老巢以分賊勢茲據英桂奏

稱懷遠賊匪甚眾鄭魁士兵力單弱自屬實在情形卽著英桂將
伊興額等馬隊暫留懷遠一帶協同鄭魁士會剿如已行抵清江
諭令邵燦等迅卽截回皖省交英桂調遣前諭和春等於珠克登
郝光甲兩人內揀派一員帶兵前赴懷遠該提督等當已派令前
進並著英桂飛速催提令其迅抵懷遠協同鄭魁士設法攻剿無
許延誤該匪等以雉河爲巢穴亟應拔其根株則餘黨無難掃蕩
此時歸德附近地方漸已肅清英桂卽應飭令邱聯恩等由營廓
集移營前進迅圖直擣老巢不得以畛域之見稍涉觀望該撫亦
卽遵照前旨前赴皖豫交界督辦其歸德防剿事宜卽飭袁甲三
妥爲籌辦西凌阿格綳額等馬隊久已到豫由京撥去之馬且已
到齊懷毫等地方旣於馬相宜並著英桂斟酌派撥進剿藉資得
力將此由六百里加緊諭令知之○以克復浦口出力總兵官張

國樑得旨嘉獎加提督銜開復總兵官武慶革職畱任處分○是月給山東聊城等五縣被水災民一月口糧加賑山東濮州等十六州縣及屯坐各衛一月口糧緩徵湖南省節年民欠糧賦